

四庫全書

子部

欽定四庫全書

子部

武經總要前集卷三

詳校官中書臣閔思毅

編修臣倉聖脈覆勘

總校官知縣臣繆琪

校對官中書臣沈培

謄錄監生臣黃廷樞

欽定四庫全書

武經總要前集卷三

宋 曾公亮等 撰

制度三

叙戰上

叙戰中

叙戰下

抽隊

軍爭

以寡擊衆

捉生

叙戰上

夫上兵伐謀其次伐交其次伐兵伐謀者攻敵之心使不能謀也伐交者絕敵之援使不能合也伐兵者合必於力士之場不得已而用之也然則善制戰者必先審於已一得地利二卒習服三器用利然後審彼之形勢不明敵人之政者不加兵不明敵人之情者不誓約不明敵人之將者不先軍不明敵人之士者不先陣知彼知此則始定計於內出兵於境是曰以理擊亂以教卒

練士白徒毆衆無不克也故兵法曰善用兵者修道而

保法一曰度二曰量三曰數四曰稱五曰勝

上五者未戰先計處

必勝之法也

地生度

地者遠近險易也度計也未出軍先計敵國之險易道路之迂直兵甲孰多勇

怯孰是計度可伐即出其軍也

度生量

量酌彼我之形勢

量生數

數機變也先酌量計度被

我之疆弱利害然後為機數也

數生稱

稱校也校彼我之勝負

稱生勝

稱量計度萬無失勝

之道此所謂修道保法也

是故勝兵先勝而後求戰敗兵先戰而後

求勝其或知吾卒之可以擊而不知敵之不可以擊勝

之半也知敵之可以擊而不知吾卒之不可以擊勝之

半也知敵與吾卒之可以擊而不知地形不可戰勝之半也夫戰兵先欲團一團一則千人同心千人同心則有千人之力萬人異心則無一人之用心齊力均故古之稱如率然率然者常山蛇也擊其首則尾至擊其尾則首至擊其中則首尾皆至或問可使如率然乎曰可矣吳人與越人相惡當其同舟而濟則其相救也如左右手又曰軍身也卒肢也伍拇指也

大將以軍為身小將為四肢士伍為

也
拇指

謂將之役士士之從將如一身之與四肢拇指也

夫伍兵伍當也長以衛短短以救長

五兵長短各有所宜

兵不雜

則不利長兵長兵以衛短兵以守太長則犯太短則不

及太輕則銳銳則易亂太犯則鈍鈍則不濟

犯謂觸挂也兵長短

相為衛太犯太輕皆不中法度也

故給兵配仗咸有率分夫兵以詐立

以利動

見利始動

以分合為變也

或分或合以戰敵人觀其應我之形能為變化以取

戰勝也

其疾如風

來無迹至迅疾也

其徐如林

言緩行須有行列如林木以防所掩

襲侵掠如火

猛烈不可向也

難知如陰

如凝雲蔽天不見三辰也

動如雷霆

如空中擊莫知所避

掠鄉分衆

敵之鄉道聚落無有守兵六畜財穀剽掠則須分配次第使眾人皆

得往也不可獨有所任則大

闢地分利

開拓土地則分利與有功者

懸權而動

如權衡稱量已定然後動也

動不可久久則鈍兵費財挫

威詘力縱敵生變失利後時故善用兵者見敵之虛乘

而勿假追而勿舍迫而勿去始如處女敵人開戶後如

脫兔敵不及拒敵之開闔當亟入之

敵有間當急入

故曰兵之

情貴速乘人之不及也雖然猶須以治待亂以靜待譁

以逸待勞以近待遠以飽待飢故曰見利宜疾未利則

止趨利乘時間不容息先之一刻則太過後之一刻則

失時也夫善戰者能易寡為衆易衆為寡何為其然哉
常出其不意衝其所虛形人而我無形使我常專使敵
常分我專為一敵分為十則此衆彼寡我所與戰者約
矣我之戰地常使不可知則敵所備者多則我所與戰
者又寡矣故曰心疑者北力分者弱若能分人之兵疑
人之心則鎗鏃有餘不能分人之兵疑人之心則數倍
不足夫戰固有當擊當避當縱者擊其微靜懈怠無備而靜避
其彊靜攻守自備閒處而靜擊其倦勞避其閒窵勞倦者疲困閒窵者暇逸無

擊堂堂之陣

堂堂大也

無邀正正之旗

正正齊也

至若朝氣銳晝

氣惰暮氣歸必避其銳氣擊其惰歸歸師勿遏圍師必

關

圍兵者圍三面開其一面以示生路也

窮寇勿迫如此類皆敵人方來

氣盡銳而來不可亟爭故避而殺其鋒開而誘其潰也
或問敵衆而整將來待之若何曰先其所愛則聽矣敵
所愛而恃者便地饒野糧道也先之奪敵人心也夫
戰兵貴勢勢可以先戰而震敵於其乘利則疾奮敵不
暇支則譬如破竹數節之後迎必自解不復櫻手然則

兵之所以能為勢者有三一氣勢二地勢三因勢若將
勇輕敵士卒樂戰三軍之衆氣如飄風此謂氣勢也關
山狹路大阜深澗龍蛇蟠踞羊腸狗門一夫守險千人
莫過此謂地勢也因敵惰怠疲勞飢渴前營未舍後軍
未涉此謂因勢也有此三者若兵非齊志非敢決非必
死非蓄怒亦莫能為勢也故曰善戰者其節短其勢險
勢如張弩節如發機又曰戰人之勢如轉圓石於千仞
之山決積水於千仞之溪至於漂石者皆勢由然也可

不務乎夫戰兵常持有餘以待不足故無犯進止之節
無失飲食之適無絕人馬之力若進止不度飲食不繼
馬疲人倦而不解舍則兵不堪命不堪命則不任其上
令上令既廢以居則亂以戰則北矣其要在更戰更息
則用之不竭也故曰三軍人戒分日

戒三軍人之中
如半日可止夫

衆以合寡則為追襲而開之

合交戰也追逐也襲圍也
以衆敵寡者逐而圍之開

其去道令無
為窮寇也

或分而迭擊

以衆攻寡分衆更戰更息
知我使我勞故能克也或

三分而乘之

三分以一分餌之彼趨利
而亂餘二分為奇襲之

彼衆則以方從

之

方術也謂設詭詐奇變敵雖衆分其形勢使不併力而戰也

又曰敵若衆衆則受

圍

以兵寡則士意不專當作利道受圍以堅衆心分兵四面受敵則衆以死向生也

兵士甚陷

我乃不懼

謂陷則死戰求生也

故知以固存以危勝

人乘危則以死而易生也

又曰使人如坐漏船之中伏燒屋之下

投兵于死地示令自求生則

智者不得不謀勇者不得不決也夫重用兵者強輕用

兵者弱猶為不可故其黷武而國利兵久而國不危者

未之有也善用兵者故役不再籍糧不三載因糧於敵

以足軍食是謂兵鬪拙速未覩巧之久也法曰天下以

戰為國者五勝者亡四勝者禍三勝者霸二勝者王一
勝者帝此謂兵黷戰久殘人屈財之如此也故古之明
主知將之言乎戰者莫之敢易也

叙戰中

兵法曰凡戰畫以旌旗旄旛為麾夜以金鐸鼓鼙荻為

節

鼙荻蘆葉古
先吹為號令

麾左而左麾右而右鼓之則進金之則

止一吹而行再吹而聚三軍服威肅命如此則前無堅
敵若聞鼓不起聞金不止雖有百萬之衆何益於用哉

故戰之道等藝立卒伍定列行正從容固言名實

等此方也

次第其才能相集使卒百人伍五行列左右前後從容者駐止未戰時欲堅固有備言名者各以是為名也

位欲嚴政欲栗色欲窵氣欲閑心欲一

上下尊卑能相臨制賞罰必行

故人戰栗窵伏也氣閑則軍靜不擾一同也心一則力同

陣行惟疏戰惟密

疏者間空其間

密者行止相承之道也

遠者示之則不畏近者勿示則不散

用兵之道

開敵之實示敵之虛凡相去遠吏士見實猶不畏近則勿示敵虛實但嚴備以一士心也

示之以顏

色告之以所生

大將示人以悅樂之色告以利害及必勝之道

兩鋒相值有將

未知敵則用寡而觀其變

先以卑弱不能示之觀敵之變化也

進退而

觀其固

以輕兵進至敵左右觀察之也

危而觀其懼

觀敵危事以知敵恐怖得失形勢也

靜而觀其怠

敵靜不動相視吏士懈怠與否也

動而觀其疑

輕兵挑戰相視敵人

知其疑否襲而觀其治

虛者闕無固備怠者錯亂相干

設而觀其作

設我陣伍觀敵

所施皆候敵家先動變生其間我得其形則以計應常擊

其亂不攻其治故善戰者應形於無窮

每有形我則隨應之

其理

未可見且以數相持敵若執數我先動則就陰以虛應

實必為之擒譬夫虎豹不動不入檻奔麋鹿不動不罹

網羅凡物未有不以先動而受制於人也或待衆之作

則循物而勿鼓

或待我衆自動欲戰則因而鼓進之未戰且當循理兵械部曲申明號令勿得

先鼓也

故曰稱衆因地因敵陣令心

稱量衆寡之數土地之宜因敵陣形為陣

令出心得衆心

雖然若後動者不能觀敵而制計則禍愈於先

動故曰先則弊後則懼也

兵先舉則勞弊後起則志意不定而恐懼也

又曰

先人有奪其心後人有待其衰也其或敵攻則屯而伺

之

敵盛來攻則吾屯守為主視敵為客客有虛失乃以兵應之也

敵謀老我師堅陣

不動則諜以先之

先使輕翼兵諜呼而動之

擊其疑駕其卒

示敵以利而不

敢進者疑也則不可先加兵以卒暴擊之也

致其屈襲其規

分敵之衆以盡其人襲其不忌

之處也

上下同欲敵莫之禦戰勝則與衆分善

將不自取功推與下

之分

若將復戰則重賞罰

戰勝而重當戰必先戰之賞罰

誓以居前無

復先術

復戰者必又以賞罰約束先誓軍其戰則變易不可用先所勝者耳

夫先處戰地

而待敵者勞故善戰者致人而不致於人

令敵來敵我蓄力待之不

往赴敵恐人勞也

能使敵人自至者利之也

誘以利也

能使敵人不

得至者害之也

出其所必走攻其所必救也

若擅利則釋旗迎而反

之

反轉戰也若已據利地則藏衆委旌旗示敵寡弱縱輕兵挑戰迎之於險也

夫戰以猶豫

為凶以隱微為勝事莫大於必果功莫成於勇決譬夫

一盜奮戈於市則萬人辟易非一盜獨勇萬人皆怯必

死與必生非對也故曰居國惠以信在軍廣以武必上

果以敏

必上合兵也凡攻戰必利決斷不失其時也

夫戰用寡固用衆治寡

利煩衆利正

兵少故不可勝兵多大勝不錯亂行伍列正旌旗也

以輕行輕則危

也

輕兵高材疾足追奔逐北翼助進止也者必當須成部伍循節度進止也

以重行重無功

重兵若但持堅固守不妄進退雖不可勝不能得利無功也

進則相為重輕也持堅

固守輕兵攻取相恃為用為守固

夫必勝之兵隱謂先用弱於敵而後

戰也

計先定為必勝藏其形勿令敵知則備我

譬夫搏攫抵噬之獸其用

齒角爪牙也託於卑微隱蔽所以能為暴

言勝兵隱伏形勢以驕敵

人伺其懈怠則擊之也

故曰亂生於治怯生於勇弱生於強

欲偽為亂

形以誘敵人先須至治然後使敵人不知已也欲偽為怯形以誘敵人先須至勇然後使敵人不懼我也欲偽

為弱形以驕敵人先須至強然後使敵人不輕侮我軍也善動者形之形之敵必

從之

見贏形也予之敵必取之

以利誘敵敵遠雖其以利動而以便利擊之也以利動

之以本待之故事省而功倍也

利以動敵敵既從我則嚴以待之

所以

佯北勿從

恐有伏兵

餌兵勿食皆此謂也亦復因敵之險以

為已固因敵之謀以為已事審因求勝不可窮也

叙戰下

唐李靖法凡出兵且以二萬人為準分為七軍中軍四千
人左右虞候二軍各二千八百人左右四軍各
二千六百人總而言之得二萬人內取萬四千人
為二百八十四隊出戰六千人守輜重凡中軍四
千人內揀戰兵二千八百人五十人為一隊計五
十六隊其間弩手四百弓手四百馬軍一千跳盪
五百奇兵五百左右虞候軍各二千八百人每軍

取戰兵一千九百人弩手三百弓手三百馬軍五百跳盪四百奇兵四百左右軍各二千六百人每軍內揀戰兵一千八百五十人弩手二百五十弓手三百馬軍五百跳盪四百奇兵四百凡出戰布陣先從右虞候軍引出次右軍次中軍次後軍次左軍次左虞候軍自馬軍八十隊外其步軍二百隊中軍三十六隊左右虞候兩軍各二十八隊左右廂四軍各二十七隊須先置大隊以三十隊

或作

三隊合為一隊防賊併兵衝突其隊在陣中安置使

均其大隊五十隊

或作五隊

中軍三隊餘六軍各二隊

通五十八隊合有七十隊

或作百七十隊

為戰駐等隊其

馬軍各在當戰駐隊後左右下馬立布陣訖鼓音

發其弩手去賊百五十步即發箭弓手去賊六十

步即發箭若賊至五十步內即射手合弓弩令駐

隊人收其射手先絡膊將刀棒自隨即與戰鋒隊

齊入奮擊戰鋒每隊重行在戰隊前聞鼓聲即羣

入也其馬軍跳盪奇兵不得輒動若步兵被賊威
逐則跳盪馬軍奇兵迎前騰擊步兵須却回整頓
援前若跳盪奇兵又為賊排退戰鋒等隊即須齊
進奮擊如擊賊退馬軍亦不得遠追審知賊勢散
亂然後追襲敗賊已收軍其舉槍卷旗一如教法
如營中不守固無險可恃即軍中量撥可恃兩隊
克駐隊令堅營壘若軍牢固不要防守其駐隊亦
不須出戰若敵人恃險回山布陣不得橫列兵士分列
則宜為立或作堅陣法其法弩手弓手與戰鋒隊相

間引前駐隊兩邊相翼布列既定軍聽角聲展旗
捉隊看大將黃旗向敵亞鼓聲動諸軍弩手弓手
及戰鋒隊各令人促馬一時籠槍大呼齊入若弩
手弓手戰鋒等隊敗北回還即跳盪奇兵再入如
見黃旗不亞及聞擊鉦聲乃止膊上架鎗引還各
於舊處排立如聞角聲即捲旂簇隊如便放散更
聽鼓角聲依軍次還營此出戰布兵之大率也其
便宜變易則按諸陣之法

凡軍行遇敵即縮為方陣待戰

方陣具軍行次第門

敵人或擊我

前或擊我後進止未得者其陣中間最忌斷絕須速令總管部勒逐方面兵相承勿斷也

凡兵出戰每營跳盪馬軍隊戰鋒隊駐隊等分為五等各有將領出時先用某等兵入戰若續者益兵則更令一等進如此至進五等輜重隊不得輒用

凡兵每隊有隊頭兵雖隊頭前引則戰次立執旗次立左偏旗在左右偏旗在右次則隊兵分作五行在

儻旗後左右均立第一行戰鋒七人第二行八人
第三行九人第四行十人第五行十一人五行皆
解登布列為隊也

凡戰隊皆以副隊頭一人執刀押後觀兵士不入陣者
斬果毅領儻人執刀又居後督戰觀不入陣者斬
兵士盡須知左膊左肩行立依次

凡隊頭與賊鬪迫盛則左右儻旗急須赴前救援若儻
旗又被賊迫盛則行內急前救援前行進救為賊

所迫則後行準前進救之

凡隊伍被賊攻迫衆寡不敵隣近隊伍並須齊進救援之

凡以十人敵一人則圍之五人敵一人則三人攻之二人為奇伏

凡兵方戰其跳盪奇兵馬軍等隊即須量抽人馬當之仍於隊內抽捉人馬

凡彼我相敵以地利阻之不得地利以陰伏阻之又不可

得則併力偏攻

凡料敵戰地若便利則守不則去若未得戰地雖見利不可就之

凡背山戰宜藏軍少誘之入伏攻之

凡背水戰步軍當衝馬軍為翼步軍後排營有利則前戰無利則淺進

凡軍前有水陷我則據高以待之候賊至陷中即擊若賊不來則設伏退軍誘之

凡駐軍結陣不得包原隰險阻在內

凡前有深草我則緩行以待之候賊來入草則焚之賊若守不進我則迂路攻之

凡糧道易絕雖有大利不宜深入

凡暴寒暴暑者雖見大利不宜進攻

凡賊無故退軍不可進逐

凡賊守隘險我不得前進則易路退軍以誘之

凡兵趨賊帳或中道過大城要砦須下之或備之而後

過

凡與敵相迎我從直路置賊迂路使之力疲可勝

凡前路有險阻賊又固守則示利誘之潛令人取背奪之

凡未測彼情雖遇羸弱不進攻之

凡賊半隱半見似驚似亂必有謀不進攻之

凡賊數來掠我激怒士卒或偏師挑戰者不須應之恐

設伏陷軍

凡賊入隘口待十過其三則從後促脅之如賊驚亂即奮兵橫斷之然後戰

凡賊出隘口來鬪候其半出擊之左右夾攻斷其進退之路可全虜

凡賊隊暴來抽吾苗稼牛羊者當勿擊其銳按兵自固候其暮去必重掠力疲其心亦恐退還務速行隊不屬我則追擊之

凡賊來震威部伍又整我須且擇險地自固必卑辭禁

掠無激其怒賊既衆又且日久伺其懈怠或方食時可急擊也

凡兵士當戰不得離隊獻功恐為賊所乘

凡擊敵營陣初破不得便捉生口

凡戰勝逐奔約三百步則須收軍整隊恐賊窮返鬪軍
亂難整遣候騎審探若已潰則長驅追襲仍分散
逐之勿令敵衆得聚

凡賊敗而走追之防有救援過一里且止則嚴兵緩進

常去十里隨之晝則時時驚之令不得食夜則以
火照之以鼓脅之令不得宿也

抽隊

夫兵進輕退重士卒利退爭先難整敵若自後驚我軍
衆必亂敵若乘而敵我其患尤甚故對陣抽軍須設方
計隔一隊抽一頭隊押官翻押後副隊頭翻引前隊兵
皆看副隊頭進止退及百許步其隊便且止定立整頓
鎗刀執弓弩架前為將戰勢既定則又抽前隊一如上

法若賊來逼則立隊便當捍敵見抽之隊亦須回軍拒戰凡退並按次徐動不得急行仍逐隊不得相越

軍爭

兵法曰凡用兵之法將受命於君合軍聚衆交和而舍

軍門為和門兩軍相當為交和也

莫難於軍爭軍爭之難者以迂為直

以患為利故迂其途而誘之以利後人發先人至此謂當戰有所爭利則先示敵人以迂遠敵意以怠慢復誘敵人以利然後倍道兼行出其不意故能後發先至而

得所爭之要害也凡趨而爭利者不可舉軍皆進又不
可棄軍實而往故曰舉軍而爭利則不及委軍而爭利
則輜重損其法若在百里之外則千人中擇百人最勇
者先往次勇者數百人繼往罷軟者後往令相續而至
也故曰卷甲而趨日夜不處倍道兼行百里而爭利擒
三軍將勁者先罷者後其法什一而至是也在五十里
外千人中擇勇者五百人先往罷者繼往故曰五十里
而爭利者其法半至是也若二十里外爭利者則十人

中擇七人先往以其道近人所易至故可去者多亦少
敗亡故曰三十里而爭利者三分之二至是也所以常
不失也先後戰有更代也又曰先其所愛微與之期謂
敵所愛恃之處我先奪之必密與其處為期潛往赴期
敵人不覺而後之焉此皆軍爭之道也

以寡擊衆

夫以寡擊衆利在於出奇也兵法所說有三焉一曰邀
之於險二曰以整擊亂三曰以日之暮將能明此

三者則可以一擊十以千擊萬雖敵人甚衆則其勢易覆今列兵家舊說於後

凡敵衆我寡必避之於易邀之於險一人守之千人莫向如險阨相值我軍鼓譟卒起彼雖衆多前徒固已驚駭乘此擊之勢却則破也一說得邱阜林木之地可廣設旗幟多置鼓鐸散為疑兵敵人必分軍以備我則選精銳出奇以擊之若未得利且依蔽林木踈我行隊以弓弩居前當之俟夜晏則疾

擊也

凡小陣逢大陣不利持久敵意輕我必不憚戰宜乘利
速進敵人兵衆陣大多連延不整金鼓之音不相
聞旌旗之色不相見左不聞右右不聞左前不聞
後後不聞前如此我以少衆併力擊之必勝矣或
敵人下營未定布陣未定備壘未成法令未施皆
可疾擊也兵法又謂敵衆我寡則作利道受圍以
堅衆心四向而受敵我兵則在死地而決戰也

凡戰敵人之衆或分為三四或西或東更息更戰或鼓
譟而行或靜居而伏使輕騎馳我左右則我當候
日暮而擊之使一人操炬二人同鼓或明或暗或
鼓或呼或銜枚止聲而疾擊其兩旁衝其左右或
勇士直衝其陣敵人雖衆其將可虜也

捉生

凡軍中立威怖敵莫重捉生獲賊千兵不如生擒一將
其法擇士之身手強敏者專教以弓矢鎗刀撩鉤

搭索悉使精習馬之壯健疾走鞍勒牢密者部為
三百人每百人為一隊若賊出小陣偏師其將必
勇當為利以誘之使貪功輕鬪乃以一隊即近為
伏一隊為直衝一隊為駐隊直衝隊既入緩則撓
擊急則引走駐隊候直衝隊過直前粗若支敵示
引走敵見兩隊全走又無旁救必速追奔待引賊
過伏隊處即發掩伏背殺之兩隊回旗應接自成
擒矣如列大陣即以三隊合為一隊望陣疏或囂

處突過之皆捉賊將假令未獲撓之令亂亦當奔
北也

武經總要前集卷三

欽定四庫全書

武經總要前集卷四

宋 曾公亮等 撰

制度四

用車

用騎

奇兵

料敵將

察敵形

用車

車戰三代用之秦漢而下寢以騎兵為便故車制湮滅
世莫得詳至漢衛青擊胡以武剛車自環為營縱騎兵
出擊單于於是遁走李陵深入胡地卒與虜遇眾寡不
敵陵以大車為營引士卒於外千弩俱發虜乃解去晉
馬隆討樹機能賊乘險設伏遏截隆前後隆依八陣圖
作偏箱車地廣則以鹿角車營路狹則為木屋施於車
上且戰且前遂平羌眾唐馬燧亦造戰車蒙以狻猊象
列戰於後行則載兵甲止則為營陣或塞隘以遏奔衝

本朝咸平中吳淑上議復謂平原廣野胡騎歟至苟非
連車以制之則何以禦其奔突用車戰為便

其制取常用車接其

衝抵駕以一牛布為方陣四面皆然東西鱗次前後櫛
比上置檣以辨外向蔽草以防火攻列士卒於外前
行持槍盾後行持弓弩賊至合兵士上車每載四人皆
持弩車陣之內數十步間連六車或四件上為重屋旋
強弩賊至擊鼓為節以射之此數者皆謂以車為衛則
虜不犯犯乃出騎兵以擊之

非三代馳車擊戰之法然自足以禦敵制勝也惟唐房
琯擊安祿山用春秋車戰之法以車二千乘夾以馬步
賊順風颺塵鼓譟牛甘震駭因縛芻縱火焚之人畜撓

敗瑄遂遁走此亦古今殊時而用有利害也則知車戰之法所以躡蹙強陣止禦奔衝行則負載糧械止則環作營衛其用一也其制則不必盡同取地之所利與敵人之所害或因或革便於施用而已其用車之要古兵法皆具之今附於左

兵法曰用車之法五車有一長十車有一吏五十車有一卒百車有一將易戰之法五車為列前後相去四十步左右十步隊間六十步險戰之法車必循道十車為

一聚二十車為一屯前後相去二十步左右六步隊間
三十六步五車一長縱橫相去一里易戰之法一車當
步卒八十人八十人當一車一車當十騎十騎當一車
車騎者軍之武兵也故十乘敗千人百乘亂萬人用車
之道陰濕則停陽燥則起貴高賤下馳其要害逐其糧
草若進若止必從其道敵人若起必逐其跡其士須選
少壯驕健走追奔馬及馳而乘之則前後左右上下周
旋能縛束草旗力可引弩八石能射前後左右便習者

名武車之士養之不可以不厚也然用車之道死地有
十勝勢有八不可不審察也可往而無以還者車之死
地越絕險阻乘敵遠行者車之竭地前易後險者車之
困地陷之險阻出而無以返者車之絕地圯下漸澤墨
土黏填者車之勞地左險右易上陵仰坂者車之逆地
殷草橫畝犯歷深澤者車之拂地車少地易與步不敵
者車之敗地後有溝瀆左有深水右有深塹者車之壞
地日夜霖雨旬日不止道潰地陷前不能進後不能解

車之陷地此十者車之死地也拙將之所以見擒明將之所以見避凡以車陷敵者敵之先後行陣未定即陷之旌旗擾亂人馬數動即陷之士卒或前或後或坐或起即陷之陣不堅固士卒前後相顧即陷之前往而疑後恐而怯即陷之三軍猝驚背薄而起即陷之戰於易地暮不能解即陷之遠行而暮舍三軍恐懼即陷之此八者車之勝勢也將明於十害八勝敵莫之禦也至若胡騎剽輕以安車制之適當其理河朔坦平以車騎行

之正得其便故謂以車禦侮以騎逐利行有所恃止有所息居則不可犯動則不可失機此用車之利也

用騎

兵法曰騎者軍之伺候也所以擊便寇絕糧道也置騎之法凡五騎一長十騎一吏百騎一卒二百騎一將為陣之法凡騎為列前後相去二十步左右四步隊間五十步險戰之法前後相去十步左右二步隊間二十五步三十騎為屯六十騎為輦十騎一吏縱橫相去百步

周環各復故處易戰之法一騎當步卒八人八人當一騎一車當六騎六騎當一車車騎者軍之武兵也故十騎亂百人百騎敗千人選士之法取年四十以下長七八尺材必健疾力邁等倫能馳騎而善射前後左右周旋進退超越溝塹馳山陵踰險阻絕大澤涉名水敢犯強敵亂大衆者名曰武騎之士養之不可不厚也故步貴知變動車貴知地形騎貴知別徑奇道三軍同名異用若乃逆敵始至衆亂擊虛追敗離結邀前躡後斷敵

糧道掠其輜重攻其關津絕其橋梁掩其不備擊其未
整攻其懈怠出其不意燒其積聚掠其市里空其田野
俘其子弟此十六者騎兵之長也加以能合能離能寇
能追百里之期不終日千里之赴不隔旬倏而集忽而
散利則擊否則迴三軍既合陣已成列擊首則應尾備
前則衝後古之善騎者無陣不摧此又騎之捷利也故
用騎之道有八勝九敗敵人始至行陣未定前後不屬
車陷其前騎擊其左右敵人必走敵人行陣整齊堅固

士卒欲鬪吾騎翼而勿去或馳而往或馳而來疾驅如風疾擊如電白晝而昏數更旗鼓變易衣服敵人可尅敵人行陣不固士卒不鬪薄其前後獵其左右翼而擊之敵人必懼敵人日暮抽軍翼其兩旁疾擊其後或阨其壘門無令得交敵人必敗敵人涉險而來以騎絕其糧道敵人必飢地若平易四面受敵車騎合而犯之敵人必亂三軍皆走或翼其兩傍或掎角其前後敵人可敗其將可擒吾軍暮歸敵來薄我其行陣勿亂令我騎

十而為隊百而為屯車五而為聚十而為羣明舉旗鼓誘之大來抗以強弩或陷其兩旁或擊其前後敵將必虜此之謂八勝也所謂九敗者凡以騎陷敵而不能破陣敵人偽退以車騎反擊我後此騎之敗地也追北踰險長驅不止敵伏我兩旁斷絕我後此騎之危地也能往而不能反或陷於天井頓於地穴此騎之死地也所從入者泥濘所從去者遙遠彼弱可以擊我強彼寡可以擊我衆此騎之沒地也大澗深谷叢林隱蔽此騎之

竭地也左右有水前有大阜後有高山三軍戰兩水之
旁敵居表裏此車之艱地也敵絕我糧道往而無以返
此騎之困地也汙瀦塹澤進退不便此騎之患地也左
有深溝右有坑阜高下如平地望之之廣易進退相敵
此騎之陷地也此九敗之地也明將之所豫見拙將所
以陷敗可不戒之哉孫臏亦曰騎戰之道以虛實為主
變化為輔地形為佐又有十利八害焉一乘其未定二
掩其不固三攻其不屬

屬接也謂布陣未相接也

四邀其糧道五絕

其關梁六襲其不慮七襲其戰器八陵其恐惰九掩其
未喪十追其奔散此十利也八害者一敵乘背虛寇躡
其後二越阻追北為敵所覆三往而無以返入而無以
出四所從入者隘所由去者遠五澗谷所在地多林木
六左右水火前後山阜七地多汙澤難以進退八地多
溝坑衆草接茂此八害者皆騎士成敗之機將必習之
乃可從事焉

奇兵

夫奇兵者正兵之變也伏兵者奇兵之別也奇非正則無所恃正非奇則無以取勝故不虞以擊則謂之奇兵匿形而發則謂之伏兵其實則一也歷觀前志連百萬之師兩敵相向列陣以戰而不用奇者未有不敗亡也故兵不奇則不勝凡陣者所以為兵出入之計而制勝者常在奇也韓信破趙奇而有正也符堅敗於晉正而無奇也項籍善用兵者也烏江所存惟二十八騎猶分奇正況衆多者乎兵法曰凡布大陣常以十分之三為

奇伏設有萬人則一千五百人兩奇一千五百為兩伏
奇兵如手伏兵如足正陣如身三者合為一體迭相救
援戰則互為進退循環而無已故兵以正合以奇勝善
出奇者無窮如天地不竭如江河奇正相生如循環之
無端此言奇亦為正正亦為奇處則合而為正出則散
而為奇乘敵之不意以擊之之謂也至其出入詭道馳
騁詐力則勢有萬變故兵法曰能而示之不能用而示
之不用近而示之遠遠而示之近利而誘之亂而取之

實而備之強而避之怒而撓之卑而驕之佚而勞之親而離之飽而飢之安而動之攻其所不備出其所不意此兵法之所以為神也所謂能而示之不能者匈奴羸師以誘漢高圍於白登是也所謂用而示之不用者李牧按兵雲中大敗林胡是也所謂遠而示之近者韓信陳船臨晉而渡夏陽是也所謂近而示之遠者晉侯伐虢假道於虞是也所謂利而誘之者赤眉委輜重而餌鄧洪是也所謂亂而取之者李靖乘輕舟而破蕭銑是

也所謂實而備之者關侯討樊多留兵備公安南郡是也所謂強而避之者隨季良無與楚軍遇是也所謂怒而撓之者漢兵擊曹無咎於汜水是也所謂卑而驕之者石勒奉戴王浚是也所謂佚而勞之者吳子亟肆以罷楚軍是也所謂親而離之者漢王慢楚使而疑范增是也所謂飽而飢之者晉文困諸葛誕而拔壽春是也所謂安而動之者齊軍走大梁而退魏師是也所謂攻其無備者制人以不虞而敗南燕是也所謂出其不意

者鄧艾由那徑而趨劍閣是也此十有六者皆前世已
然之效也亦有因地形以為變者兵法曰師行已近敵
境者大將必謹視山川原隰之形必預計之為伏兵之
地大率溪谷之阻者所以止禦車騎也隘塞深林者所
以用少擊衆也均澤窳冥者所以匿其形也暴疾如流
矢擊之若發機者所以破精微也詭伏遠引者所以擒
敵將也四分五裂者所以擊圓破方也因其驚駭者所
以用一擊倍也因其恐懼疲倦者所以用十擊百也隘

途深草者所以伏藏也假奇伎者所以濟江河大水也大風甚雨者所以搏前擊後也偽稱敵使者所以絕糧食謬號令也山林翳薈者所以默行往來也夫兵以詐立以利動使敵人前後不相及上下不相收將卒不相救衆寡不相恃譬如蜂蠆出於懷袖烈火發於廬舍雖壯夫猛士無不驚撓我得乘而制之之謂也本朝雍熙中契丹犯塞貪婪不整無資糧輜重之給利夫虜獲衆議清野堅壁以挫之然既踰亭障散馳原野分掠田野

太宗特出聖謀選騎士之驍果及募禁衛諸班之膽勇者使押戰隊分為數十或至百隊伏緣邊要害地候其侵軼與大軍表裏奮擊晝則虛張旗幟依蔽林木使其可疑夜則潛伏郊野多用火鼓使其可懼彼腹背受敵無所倖掠我則首尾相為援也時師臣馬知節上策亦曰北面邊徼之地橫亘雖長然據要害來路惟順安抵西山耳若列陣於此各設奇兵為應使其久莫能進衆將疲弊時以偏師輕騎逼而撓之如敢來犯深入力戰

彼將顛覆不暇也咸平中契丹犯邊真宗命諸將擇銳卒散為遊兵俟戎首南侵我取徑道趨幽燕取其車帳仍俾邊郡應援之景德初亦命我軍大陣惟駐中山別擇四健將分握精騎候敵至則間道深入北境撓敵腹心以牽制之所部皆聽便宜不取上將節制此四者亦因地用奇之術也

料敵將

夫敵國治戎交和而舍不以冥冥決事必先探其將能

否而後戰因形用權則不勞而功舉左右既震則敵雖
衆必擒其將故其將愚而信人者可誘而詐貪而忿名
者可貨而賂輕變無衆者可勞而困上富而驕下貧而
怨者可離而間可用間也凡兩軍相望而患不知其將者當
令賤而勇者將吾輕銳之衆犯而挑之觀敵之來一坐
一起其政以理其追北佯為不及見利佯為不知此智
將也勿遽與戰若其衆誼譁旗幟紛亂其卒自行自止
其兵或縱或橫其追北恐不及見利恐不得此愚將也

雖衆可欺又若兩軍相持未戰未挑欲知敵將之謀者
何以能之曰彼士馬驍雄反示我以羸弱陣伍齊整反
示我以不戰見小利佯為不敢爭出奇兵誘以奔北內
實嚴備而外為弛慢頻使諜來託以忠告或執使以相
忿或厚賂以相悅移軍則滅竈合營則偃旗非得地而
不舍非全軍而不用以多擊少必候晨朝以寡擊衆必
候日暮如此則兵多詭伏將有深圖理須曲為防備也
兵法曰知彼知己百戰不殆不知彼而知己一勝一負

不知已不知彼每戰必殆是也

察敵形

兵法曰敵近而靜者恃其險也敵遠而挑者欲人之進

也其所居易者利也

言遠來挑者恃其所處平易利於作戰故欲我進前

衆木動

者來也

伐木除道欲來

衆草多障者疑也

澤中結草障蔽道路以致疑我恐見追躡

也鳥起者伏也

下有伏兵

獸駭者覆也

敵陣張翼來覆我軍

塵高而銳

者車來也

車馬行疾塵土衝起

塵卑而廣者徒來也散而條達者

樵採也少而往來者營軍也辭卑而益備者進也辭強

而驅者退也

軍任詭詐而敵使在其間觀其言之發可料其情

輕騎先出居其

側者陣也

陣兵欲戰

無約而請和者謀也奔走而陳兵者期

也

或有外兵相應之期或候吉時

半進半退者誘也杖而立者飢也汲

而先飲者渴也向人見利不進者勞也鳥集者虛也夜

呼者恐也軍擾者將不重也旌旗動者亂也吏怒者倦

也殺馬食肉者軍無糧也

殺馬食肉是無蓄儲也

懸釜不返其舍

者窮寇也

軍無懸釜者懸破之示不復炊也

諄諄翁翁徐與人言者失

衆也

諄諄兩人切語貌士卒怨將私作謗誹也

數賞者窘也

軍驕不肯戰數賞以勸之此窘

也迫屢罰者困也先暴而後畏其衆者不精之至也先行

以示強欲士卒畏服不以刑法德政不精之極來委謝者欲休息也隨進隨退謂之謝如

此倦戰也兵怒而相迎久而不合又不相去者有奇謀也使

者目動而言肆懼我也幣重而言甘誘我也兵非益多

足以併力料敵取人而已若不慮而易於敵者必擒於

人也太公亦謂用兵之法大要在審察敵人其形之變

十有五變見則擊之新集可擊敵初至行陣未整未食可擊敵

或陣日高未饋食奔走可擊行陣失次用力不齊布陣不均不戒可擊我示弱誘敵敵

不設
備
不順可擊

逆風向水向山之謂也

動勞可擊

倍道兼行人馬未歇卷甲束械

夜行於路陣雖成列前後不整

將離可擊

大將已離士卒獨任小將小將無威不能率人皆不服

長路可擊

遠行爭路夜晝不急

擾亂可擊

敵未成列縱不相屬橫不相對或坐或立

暇可擊

貪利求食不暇成陣

候濟可擊

渡河半濟

險路可擊

山路險狹沮澤泥陷

車馬單行左右難救

驚怖可擊

既路相逢都無備據鼓譟掩擊三軍怖懼

不定可擊

陣數

移易人馬候望

皆謂乘其不備出其不意使其不能為計也吳

起曰其進退多疑其衆無依可震而走士輕其將而有

歸心塞易開險可要而取

疑為不失也無依無制度也怯也士輕其將為無威也塞

易開險得地形也可
要而取言其易也

進道易退道難可來而前

可誘敵使前

進道險退道易可薄而擊居軍下濕水無所通霖雨數
至可灌而沉居軍荒澤草莽幽穢可焚而滅停久不移
將怠士懈可潛而襲日暮道遠士衆勞倦飢未及食解
甲而息可乘而虜此八者不可不察也凡戰又有不卜
而與戰不占而避之者八夫疾風大寒刮冰濟水不憚
艱難一也盛夏炎熱早行晏止士卒飢渴務於取遠二
也師既淹久糧食無備百姓怨嗟妖祥數起上不能止

下無其準前攻失序言聲高遽三也軍資既竭薪芻又寡天多陰雨欲掠無所四也兵徒不多地又不利人馬疾疫四鄰莫至五也將薄吏輕士卒不固三軍數驚師徒無助六也戰勝而驕士卒獻功行伍失序軍中譁亂七也

一本作道遠曰暮士卒勞懼倦而未食辭甲而息七也

陣而未定舍而未畢

行汲涉險半陷半出八也諸如此類擊之勿疑若其土地廣大財阜人衆惠施流博賞信刑察發必得時陳功居列任賢使能師徒之衆兵甲之精四鄰之助大國之

援凡此不如敵人者避之勿疑所謂見可而進知難而退兵法曰又當視敵鼓角人馬隊伍諠靜以避之凡金鐸之聲下以濁鼙鼓之音濕如沐旗幟皆重而自垂曳如霧霧此衰敗之兆也戎馬驚奔士卒恐懼妖言相惑以耳相屬此潰散之象也隊伍擾亂行陣不定或坐或起言語諠譟此軍亂之象也皆可乘而掩取也雖然見敵之意可擊如此又當反慮敵人矯計誘我所謂兵怒而相迎久而不合又不相去半進半退之類宜密察之

此必有奇伏之變雖云鳥起者下有伏兵其或自伏兵之上譎為棲鳥高安不動或數人立於草木之中挽弓引彈以祛飛鳥令人疑之之類則察者又須以他事參驗而後動也故曰察之而知得失之計候之而知動靜之理以衆攻衆衆存不攻以食攻食食存不攻以備攻備備存不攻釋實而攻虛釋堅而攻脆釋難而攻易此百勝之術也

武經總要前集卷四

欽定四庫全書

子部

武經總要前集卷

五

詳校官中書臣閔思毅

編修臣倉聖脈覆勘

總校官知縣臣繆琪

校對官中書臣牛稔文

謄錄監生臣萬

選

欽定四庫全書

武經總要前集卷五

宋 曾公亮等 撰

制度五

軍行次第

并圖

行為方陣法

并圖

禁諠

度險

出隘

齎糧

斥堠聽望

探旗

探馬

遞鋪

烽火

行烽

軍祭

軍誓

定惑

軍行次第

并圖

凡軍將發先使腹心及鄉導前覘逐營各以跳盪奇兵
馬軍先出去營一里外當前面布列戰鋒隊駐各持仗
依營四面布陣隊伍一如臨陣法待營中裒束輜重訖

依次第起發凡聞第一角聲絕右虞候捉馬驢第二角

聲絕即被駕右一軍捉馬驢第三角聲絕右虞候即發

右一軍被駕右二軍捉馬驢第四角聲絕右一軍即發

右二軍被駕

以上兵等唐制令官之號見令陣法

以後諸軍每聽角聲發

東被駕準此

或用笛聲代角亦便

每營各出一戰隊令取虞候進

止防有賊至使用騰擊如其路更狹小須更加角聲仍

令將校排比催督急過勿令停擁其步兵隊輜重隊二


千步外引馬軍去步軍二里外引

李靖裴緒亦同


今以軍行次

第圖列之於左

首先虞候馬
軍十隊行




次虞候步軍
五十二隊行




次右軍步軍
五十二隊行


次前軍馬
軍十隊內




次前軍馬
軍十隊行



次前軍步軍
五十二隊行




次中軍步軍
八十隊行




次後軍馬
軍士隊行

次後軍步軍
五十二隊行




次左軍馬
軍十隊行

次左軍步軍
五十二隊行



次左虞候馬
軍十隊行



右行軍之法大率如此其輜重在內計兵三萬人凡四百隊除馬軍八十隊輜重六千人外奇兵等隊悉在內也

凡軍馬行動常先右虞候馬軍為首次右虞候步軍次右軍馬軍次右軍步軍次前軍馬軍次前軍步軍次中軍馬軍次中軍步軍次後軍馬軍次後軍步軍次左軍馬軍次左軍步軍次左虞候馬軍次左虞候步軍其行每經高處即令三五騎踏高四顧

以候不虞餘軍準此候望右虞候既先發半安營
踏行道險行水草左虞候先排窄路橋津桿後收
拾闌遺排比隊仗整齊軍次使不交雜若回軍先
左虞候馬軍次左虞候步軍次左軍馬軍次左軍
步軍餘次第準前却轉其虞候軍職掌準初發交
換

凡道狹不可並行者即第一戰隊為首右戰隊次之左
戰隊又次之右駐隊又次之左駐隊又次之若道

平川闊可得並行者宜作統行法其統行法每統戰鋒隊居前兩戰隊並行次之又兩駐隊並行次之餘統準此若更堪齊頭行者每統五隊橫引齊行後統次之如每統三百人簡取二百五十人分為五隊第一隊為戰鋒隊第二隊為戰隊第三隊為奇伏隊第四隊第五隊為駐隊頭一人副隊一人其下等五十人為輜重隊別著隊頭一人副隊頭一人擬戰日押輜重遙為聲援若兵數更多皆

倣此類

凡兵每隊給一旗行則引隊住則立於隊前

或作側

大總

管及副總管則立十旗以上小總管則立四旗以

上行則前引住則立於帳前

或作側

統頭亦別給異

色旗擬臨陣之時辨其進退駐隊等旗別樣製造
令引輜重各引本軍營隊識認此旗

凡大將立五方旗依色配方面

青亂黑以畢代之務易辨也

中央土

位不動故大將軍以黃旗為四旗之主常使諸軍

準望知大將軍所在若南方有賊大將舉赤旗以
應之東方有賊則舉青旗以應之西方有賊則舉
白旗以應之北方有賊則舉黑旗以應之無賊常
偃之舉旗令諸軍知敵所從來也其諸軍見本方
方旗舉當方面兵急裹束旗若亞則前進奮擊旗
正立即止旗却偃即回

凡大將置鼓四十面小總管給十面營列給一面行即
負隨纛下擬晝夜及在道有緊急擊之令傳響相

聞如軍行時前軍卒逢賊即急擊鼓中腰聞之抽
兵急救中腰有警前軍便住後軍有警中腰亦如
之

凡有警
皆擊鼓

並量抽軍兵相救如發引稍長更須置

鼓傳響使前後得聞

凡軍行須令候騎前持五色旗見溝坑揭黃河橋揭白
水泉揭黑林木揭青野火揭赤以告大將

凡軍若若遇道途泥濘山河險隘並右虞候於諸軍抽
取役兵先行以充修理橋道開拓窄隘之用

凡兵分數道於賊界相逢遠望未審善惡臨發時須同

計會如遠探相見之時便令定立合令一隊向前

二隊步外分為兩隊左隊左

或作右

轉右隊右

或作左

轉待前隊亦盤旋相應訖即併隊左轉三匝前軍
右轉三匝各記去時旗號臨時改號亦得然後各
令一人相迎委非賊馬即得前進仍須嚴備以待
之

凡軍行在道十里齊整休息三十里會乾糧六十里食

凡法三十里為一舍倍道兼行一日再舍
今六十里為食宿亦量軍士急緩為節

凡軍士行其輜重委

於為反

積

子賜反

並在營陣中安置以

防焚掠


凡下營排兵布陣以皆取隊後過發兵收軍人皆取隊
前過如入城市街巷窄狹兩面下營人即隊前過
凡軍所過先報所在四面各三里禁絕行人六畜水陸
船乘皆令息泊虞候并遊奕將與地界所由先二
十里


行為方陣法

并圖

凡軍行漸逼賊陣或行於賊境我軍有數營發引逢賊首
尾難救須行引時先準為方陣行列以兵分為四方
輜重為兩道引戰鋒亦隊亦為兩道引其第一分初
發輜重及戰鋒分為四道行兩行輜重在中心雙引
戰鋒隊並各在輜重外左右夾雙引其第二分戰鋒
隊與前面左右行戰鋒隊相當輜重隊與前行輜重隊
相當其第三第四分並準上今約行列圖之於後


行 列 圖






凡軍行既逢賊即抽第一分中兩行輜重橫列在內為
兩重其兩行戰鋒隊橫列在外兩重為陣前面第
二分中兩行輜重即前進居陣內右偏直列為兩
重其兩行戰鋒隊前進亦直列為兩重居右偏輜
重外為陣右面其第三戰鋒隊重依第二分法轉
為陣左面第四分戰鋒隊重依第一分法轉為陣
後面令四角相接結成方陣緩急遇賊即戰賊遠
則成陣而行常令輜重併近前頭戰鋒隊相去十

步下一隊則戰鋒常裹輜重若逢川陸平坦用之
尤便要在前行隊縱橫相當布列使勻也其制具
圖如左





凡山路隘狹布陣不得須使奇隊密相連接槍旗兩邊

弓弩居後行即過

餘具山隘門

凡盛夏行師道中深草茂本四望不絕者亦約為陣而行

凡兵近敵境若過州縣城鎮皆先使人守門城中人無得輒出

凡入敵境若船渡橋梁先過重物試之然後渡軍

凡軍入賊境所經要路平陸須遣人前行探地審試慮

敵人先作方田深坑種苗於上誘陷人馬

凡暴寇來劫掠牛馬財寶不可輕動其初至氣銳犯之
未必勝候其去則邀擊之

凡騎軍入賊境惟戰具外餘物不得負斤兩之重步軍
戰具外帶物不得過十斤

禁諠

凡兵體尚靜惡諠靜則有序諠則必亂其軍行在路若
要喚人及進退止息即令每隊取曉事者二人一

人執小緋旗於本隊外傍行去隊十步以為望一人專聽傳喚如去賊近則遞相暗報欲令止息則卧旗於當隊下即住候見旗立即速行或要抽退令旗不住前招當隊回身速行其大軍首尾亦各差小校領主將處分他人不得輒傳聲

度險

凡軍行入山林翳薈之地防有伏兵先須選趨健三百人於險阻不防之處偷路過把其出道又選驍

勇當道搜索或自高山樹杪使人遠視審無藏伏
分兵前後以為領招然後遣輜重老小先度以步
兵繼其濟水亦如之

凡遇坑坎闊三五丈人馬不可通即令軍中每人把一
木椶子及一束薪芻之類遞傳填之立可度

凡遇峭峻壁之阻則以樓梯倚壁選趨捷者手執鉤竿
身繫二繩索緣梯並勾木石而上至平穩處即繫
繩於木垂兩頭至地繫橫闕為軟梯與衆軍攀援

并續加繩索及縋人登之

出隘

凡軍行賊境若逢山水窄隘橋梁濟渡須防壅遏自相蹂踐及為敵人邀截先令左右廂虞候各負第一隊過便於兩邊卓隊排陣以為防招次第二隊過以次排立第三隊亦如之餘軍亦準此待末隊過盡即左右兩廂對行引發如非賊境即軍伍相連緩行過唐依常引發仍置斥堠遠望如前法

齋糧

夫千里饋糧士有飢色樵蘇後爨師不宿飽况深入敵境飛輓不通襲師躡寇益資擬備雖云因糧於敵亦虞清野以待舊法人持乾糧三斗可用數旬若班師在道去境猶遠儲貯乏絕即須揀擇羸瘦牛馬應卒以充軍食庶人力不至為賊困逼 舊法米一石取無穀者淨淘炊熟下漿水中去水曝乾淘去塵又蒸曝之經十遍可得二斗每食取一大

合先以熱水浸之待濕透然後煮食之一人可五十日

鹽三升以水和入鍋內炭火燒之即堅小不消一

人食可五十日又宜夏月將行麤布一尺以一

升釀醋浸曝乾以醋盡為度每食以方寸煮之可

食五十日取小麥麪作蒸餅一枚浸醋一升

或作

斗曝乾以醋盡為度每食梧桐子大煮之人可食

五十日豉三升搗如膏加鹽五升捻作餅子曝

乾每食如棗核大醬菜人可食五十日米麴一

升人可食一日 牛一頭食之五十人可一日馬
一匹食之五十人可一日驢一頭食之三十人可
一日 如更急難諸戎褻用皮者亦可煮食救飢
山行即採松皮每十斤與米五合煮之令爛熟
半斤人可食一日 每人將油麻半升如渴取三
十粒含之立止亦可將烏乾酪行每人將葫蘆子
或竹筒皮槩可受三升者料前程乏水即盛行馬
軍每人將乾酪與馬恐渴乏 近代邊兵遠行則

有糜餅皸飯雜餅之類糜餅用糜末作麴投沸湯和為餅厚一分候冷切作碁子曝乾收貯如在營砦內以湯飮而食之如路行及戰陣中乾食之味美不渴愈於雜餅皸飯麴並製如法惟曝極乾令可齎持及久

斥堠聽望

凡軍遣候吏必擇精明勇敢奇謀遠慮者令彼鄉國之人引導而往或刻獸足印中途為却行之狀或上

冠微禽而隱伏叢薄之間蓋欲密聲晦迹懼人知
覺然後傾耳而聽專目而視諦伺宅物以迎知敵
人之情故見水痕則知敵濟之早晚觀樹動則驗
寇來之馳驟衆草多障者使我疑也飛鳥不泊者
下有伏兵也駭獸奔逸者謀潛襲也襲敵來之伏
餘見察敵形
門凡此之類皆可察而預知之必待逢敵之軍而
後用其耳目則不能及矣若師行斥堠多擇高要
之處察望四邊前探不得推後探以為鋒左手不

得望右手以為固是以軍行軍止必先謹候之法也

探旗

軍前及左右下道各十里之內五人為一部人持一白
幡一絳幡見騎賊舉絳幡見步賊舉白幡轉語後
第二第三部詣主者白之賊百人以下但舉幡指
百人以上舉幡大呼主者遣疾馬往視

探馬

軍行前後及左右肋上五里著探馬兩騎十里加兩騎
十五里更加兩騎三十里用十二騎前後為一道
其最速以及次速者各等第揀壯馬給與之馬弱
則恐為敵所擒若兵多發引稍長即肋上更量加
一兩道其乘馬人每令遙相見常接高行各執方
面旗無賊則卷有賊則舒以次第應之大軍見旗
展則知賊至庶先賊來足得擇利便設機應變迎
前出戰也

遞鋪

凡軍行去營鎮二百里以來須置遞鋪以探報警急務
擇要徑使往來疾速平陸別置健足之人水路則
作飛艇或五里或十里一鋪縱非寇來之方亦須
置之

烽火

烽火軍中之耳目豫備之道不可闕也唐兵部有烽火式
尤為詳具今之邊塞所置則頗為簡略而易從唐

李筌所記法制適與今同以唐式錄為前而今法
次之庶參考用焉

唐法凡邊城候望每三十里置一烽須在山嶺高峻處
若有山岡隔絕地形不便則不限里數要在烽烽
相望若臨邊界則烽火外周築城障

凡掌烽火置帥一人副一人每烽置烽子六人並取謹
信有家口者充副帥往來檢校烽子五人分更刻
望視一人掌送符牒並二年一代代日須教新人

通解始得代去如邊境用兵時更加衛兵五人兼
守烽城無衛兵則選鄉丁武健者給仗充

置烽之法每烽別有土筒四口筒間火臺四具臺上插
橛擬安火炬各相去二十五步如山險地狹不及
二十五步但取應火分明不須限遠近其煙筒各
高一丈五尺自半以下四面各間一丈二尺向上
則漸銳狹造筒先泥裏後泥表使不漏煙筒上著
無底瓦盆蓋之勿令煙出下有烏爐竈口去地三

尺縱橫各一尺五寸著門開閉其烏爐竈門用木
為骨厚泥之勿令火焰燒及其烽筒之外皆作深
塹環繞在烽貯備之物要柴藁木材每歲秋前別
採艾蒿莖葉葦條草節皆要相雜為放煙之薪及
置麻蘊火鑽狼糞之屬所委

於偽反

積

子賜反

處以掘

塹環之防野燒延燎近邊者亦量給弓弩用烽火
之法應火炬長八尺檣上火炬長五尺並二尺圍
乾葦作薪葦上用乾草節縛縛處周迴插肥木其

次炬檟等在烽每道當蓄二千

或作十

具以上於舍

下作架積貯不得雨濕其土筒裏常須預著羊糞

鬱心火使暖

凡應火土筒若向東應筒口西開若向西應筒口東開

南北準此比諸烽煙相應時於土筒旁級上立開

盆放煙合盆滅其煙看放時若無事盡一時有事

一日若晝放煙至夜即放火無事盡一夜若夜放

火至天曉還續放煙後烽放訖前烽不應煙盡一

時火盡一炬即差脚力人走問探知失候或被賊
掩捉其脚力問者即亦須防慮且至烽側遙聽如
無消息喚烽帥姓名若無人應接先徑過向前烽
依式放火仍錄被捉失候之狀告所在州縣勘當
凡白日放煙夜則放火先須看筒裏至實不錯然後相
應時將火炬就烏爐竈口裏焚熬成煙出外應滅
訖別捉五尺火炬安著土臺檣上煙相應時一爐
筒煙一人開閉二筒煙二人開閉三筒煙三人開

閉四筒煙四人開閉若晝日陰晦霧起望煙不見
原放之所即差脚力人速告前烽霧開之處依式
放煙如有一烽承兩道以上烽者用騎一人擬告
州縣發驛報烽來之處若烽與驛相連者即差驛
馬

凡寇賊入境馬步兵五十人以上不滿五百人放烽一
炬得蕃界事宜又有煙塵知欲南入放烽兩炬若
餘寇賊則五百人以上不滿三千人亦放兩炬蕃

賊五百騎以上不滿千騎審知南入放烽三炬若
餘寇賊三千騎以上亦放三炬若蕃賊千人以上
不知頭數放烽四炬若餘寇賊一萬人以上亦放
四炬其放烽一炬者至所管州縣鎮止兩炬以上
者並至京原放煙火處州縣鎮即錄狀馳驛奏聞
若依式放烽至京訖賊回者放烽一炬報平安凡
放烽告賊者三應三滅報平安者兩應兩滅

凡告賊烽起處即須傳告隨近州縣鎮城堡村坊等人

令當處警固不得浪行遞牒

凡烽號隱密不令人解者惟烽帥烽副自執烽子亦不

得知委

凡烽帥烽副當番者常須在烽臺檢視若將家口聽於
塹內安泊烽子則晝分為五番夜分持五更晝堠
煙夜望火凡烽火一晝夜須行二十里

今法

與李筌
法同

明烽臺於高山四望險絕處置無山亦於

平地置下築羊馬城高下任便常以三五為準臺

高五丈下闊三丈上闊一丈形圓上建圓屋覆之
屋底徑闊一丈六尺一面露出三尺以版為上覆
下棧屋上置突竈三所臺下亦置三所並以石灰
泥飾其表裏復置柴籠三所流火繩三條在臺側
近上下用屈膝梯上訖復收之四壁開四望賊孔
及安火筒置水罍乾糧麻蘊火鑽蒿艾狼糞牛羊
糞每晝夜平安舉一烽聞警鼓舉二火見煙塵舉
三火見賊燒籠柴如每早夜平安火不來則烽子

為賊所捉一烽六人五人烽子遞知更漏觀望動
靜一人烽帥知文書符牒轉遞之事

行烽

凡軍馬出行擬停三五日即須去軍一二里以便權置
燿烽如有動靜舉烽相報其烽並於賊來要路每
二十里置一烽連接至軍所其遊奕馬騎晝日遊
奕候視至暮即移十里外止宿防賊徒暮間見煙
火掩襲烽人其賊路左右仍伏人宿止以聽賊徒

如覺賊來即舉烽遞報軍司賊十騎以下即舉小
炬火前峰應訖即滅火若不及百騎至二百騎即
放一炬前三百騎至四百騎即放二炬若五百騎
至五千騎即放三炬準前應滅前峰應訖即赴軍
若慮走不到軍即且抵山谷藏伏既置燿烽軍內
即須置一都烽應接四山諸烽其都烽如見煙火
忽舉即報大總管某道烽火起大總管當須戒嚴
收斂畜產遣人斥探

軍祭

本朝咸平四年詔禮官詳定禡於所征之地禮付北面
總管其祭除地為壇以祠黃帝軒轅氏用羊豕代
太牢都總管為初獻餘用舊儀其牙神毒縣神以一
少牢其幣牙以白纛以皂用剛日以漆器常饌祠
之於壇繞以青繩覆以幄幕置軍牙大纛位
方七寸厚三分亦三
獻饗鼓以一豕祠官皆戎服清齋一宿舊法兼祭
風師祭雨師祭馬祖其薦獻亦用牲牢酒脯香幣

如上儀惟風師磔犬以為牲祝曰維某年某月日將帥具官稱名姓謹以某物之奠致祭於某神凶

黨首難干紀亂常毒流生人惡在不赦受命徂征

恭行天討殄寇克敵繫神是助尚饗

一說祭為位設此沙門天

王有祠則就其祠無祠則望北為位設香燈清泉浸楊柳乳粥酥蜜餅食之屬

三軍首路

之日則祭道路神以車犯較

祭禮於城外首路封土為山形蒲芻棘栢

為神主祭儀牲幣皆準上

祭畢以車轢之而過謂之犯較軍在

道路凡遇名山大川百神祠廟皆遣官以酒脯祭

告

軍誓

兵法曰夏后氏誓衆於軍中欲人先成其慮也商人誓衆於軍門之外欲人先意以待事也周人將交刃而誓之以致人意也故書之所紀三代令主出兵伐罪必立誓命之文所以申飭有衆堅整士心為戰陣之首也今之出師凡將發及戰主帥當親臨士衆明布誓言使在下無不聞者感激衆志然後

行也大將某官告爾三軍將校士卒整爾衆無譁
其端聽予命令今戎夷不賓侵敗王略撓我邊陲
害我穡事毒流於庶民皇帝授我斧鉞肅將天誅
爾尚一乃心力銳乃戈矛往殲大慙有進死而榮
無退生而辱用命有厚賞不用命有顯戮勉哉爾
衆服勤王事毋干典刑

此誓之大槩也主兵者臨時為約以誓軍

定惑

夫萬衆之聚事變不一起為譁亂不可不慮或士卒未

信下輕其上或妖異數起衆情生畏主將當修德
改令繕礪鋒甲勤誠誓衆以祇天戒復擇吉時具
牲牢盛饌震鼓鐸之音以祭牙旗精意虔請以觀
祥應若人馬喜躍旌旗皆前指高陵金鐸之音揚
以清輦鼓之音宛以鳴此得神靈之助當示衆以
安其心否則矯說善祥而布之於下乃可定也雖
云任賢使能則不占而事利令明法審則不筮而
計成然而智者以權佐正古稱有五助焉一曰助

謀二曰助勢三曰助怯四曰助疑五曰助地兵家
之機不可不察也

餘見故事假託安衆門

武經總要前集卷五